

Inatsisartut suleriaasianni § 33, imm. 3, nr. 1 naapertorlugu Nunat Avannarliit Killiit Siunnersuisoqatigiiffiannut aallartitat siulittaasuat aalajangiiffigisassatut siunnersuut manna saqqummiuppaa:

Nunat Avannarliit Killiit Siunnersuisoqatigiiffiata kaammattuutitut aalajangersagaanik nr. 1/2012-imik, ataani allassimasutut oqaasertalimmik, Inatsisartut tapersiinissaannik Inatsisartut aalajangiiffigisassaattut siunnersuut:

Nunat Avannarliit Killiit Siunnersuisoqatigiiffiata Savalimmiuni Naalakkersuisut, Kalaallit Nunaanni Naalakkersuisut aamma Islandimi Naalakkersuisut kaammattorpaat suleqatigeeqqullugit allaaserisaqartarneq atuakkiortarnerlu nukittorsarniarlugit nunani ataasiakkaani atuakkiortut peqatigiiffii suleqatigalugit atuakkiortunut siunissamilu atuakkiortunngorumaartussanut allassinnaanermut pikkorissarnernik peqatigiillutik aaqqissuusseqqullugit.

(Nunat Avannarliit Killiit Siunnersuisoqatigiiffiani aallartitaat Siulittaasuat, Lars Emil Johansen)

Akissuteqaat

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Siullermeerneqarnera

Naalakkersuisut Nunat Avannarliit Killiit Siunnersuisoqatigiiffiata aalajangersagaanik nr. 1/2012-imut Inatsisartut tapersiinissaannik Inatsisartut aalajangiiffigisassaattut siunnersuummut qujapput.

Naalakkersuisut qujarutigaat tikilluaqqullugillu suliniutit atuakkiortunut siunissamilu atuakkiortunngorumaartussanut allassinnaanermut pikkorissartitsinermit tunngasut. Naalakkersuisut suliniutit allassinnaanermut pikkorissartitsinerit tapersersugarivaat aningaasanullu inatsimmi periarfissaqarpoq taamatut ittunut aningaasaliisoqarnissaanut, taamaasilluni atuakkiortut peqatigiiffiat aammalu allat soqutigisallit pikkorissartitsinissamut assigisaanullu aaqqissuusinnissaminnut aningaasanik taperneqarnissamut qinnuteqarsinnaallutik.

Piffissami kingullermi Naalakkersuisut aningaasaateqarfiit allat peqatigalugit aningaasaleeqqammerput inuusuttunut allannermik unammisitsinermit "Allatta"-mut, Nunani Avannarlerni Piorsarsimassutsikkut Attaveqaat (NAPA), Nunatta Atuagaateqarfia, Nuummi

Inuusuttut Siuarsartut (NUIF) aammalu atuakkanik naqiterititsisarfik Milik Publishing suleqatigalugit aqqissuussaanut. Tamanna kingunerivaa allaaserisanik naatsunik katersanik saqqummersitsineq, peqataasullu nunanut avannarlernut isumassarsiorlutik angalassamaarput. Aqqissuussinerit taamatut ittut Nunat Avannarliit Siunnersuisoqatigiit iluanni aammattaaq isiginiarneqartarput.

Nunat Avannarliit Killiit suleqatigiinnerat eqqarsaatigalugu Naalakkersuisut pitsaasutut isigivaat nunanit avannarlernit atuakkiortunut siunissamilu atuakkiortunngussamaartunut allassinnaanermut pikkorissartitsinerit, allassinnaanermut periaatsinik pikkorissartitsinerit assigisaallu. Soorlu kaammattuummi oqaatigineqartoq, pingaaruteqarpoq peqatigiilluta peqataanissarput atuakkiortugut siunissamilu atuakkiortunngorumaartussallu eqqarsaatigalugit taakku nukittorsassallugit aqutissiuutissallugillu.

Naalakkersuisut nunatsinni atuakkiortut peqatigiiffiannut “Kalaallit Atuakkiortut” kaammattuutip imarisaa pillugu oqaaseqartitsisimapput, atuakkiortullu peqatigiiffiani siulersuisut pineqartoq tunngaviatigut tamaat ilalersornartutut isigaat. Pingaaruteqarpoq nunatsinni atuakkiortoqartuarnep atuakkiortussamaateqartuarnepullu pingaaruteqassusia pillugu suliniutinut taama ittunut akuersaartumik pissuseqartarnissaq.

Taamatut oqaaseqarlunga Naalakkersuisut siunnersuut matumuuna akuerineqarnissaa inassutigaat.